

四庫全書

集部

欽定四庫全書

集部

范忠宣集卷八

詳校官庶吉士

臣龍廷槐

檢討

臣何思鈞覆勘

總校官中書

臣朱

鈐

校對官中書

臣潘

庭筠

謄錄監生

臣潘

衡

欽定四庫全書

范忠宣集卷八

宋 范純仁 撰

啟狀

賀光州石郎中得替

伏審解符劇郡奏課中宸方脂牽之有期阻班荆而伸
餞矧久降於封壤復幸託於葭葦深荷庇存殊增感戀
伏惟某官清規表俗雅量鎮浮屢更共治之權藹著于
蕃之績鋒車入覲宜多獻可之謨芝檢頒恩佇被陟明

之典炎歆在候保練是期嚮往之勤敷陳曷罄

荅門生改官

某啟向以輕言輒揚善最果遷美秩彌慰下衷馳慶幅
之未遑辱華牋之首及感銘交至敷敘奚殫

謝潘著作

伏審奏課宸庭陞華芸省伏惟慶慰某官清規表俗雅
望映時果膺當宁之知峻被出綸之命佇騰驥步別迂
龍光先沐榮音竅深感素

謝王長官

言念高風久阻牢想空馳幸茲官守之隣稔服民謠之
美徒懷矜式闕奉音題豈圖謙眷之隆特貽長牋之貺
愧銘交積敷敘奚殫

回蔡州胡完夫史君

某比者官忝新名職還舊物恩榮併至衰拙何堪荷滿
滌於君仁賴吹噓於朋好此蓋知府學士道充在已恕
及於人愍同志而不遺借片言而為寵致茲朽質復玷

清途深蒙引重之私莫識醺知之地仙山重到恍如丁
令之歸宣室召還行聞賈傳之命尚賒瞻晤更冀保願

回時狀元

伏審射策明庭冠名多士伏惟慶慰狀元廷評識臻道
與學洞聖源旦暮昌辰超騰夸路仁義之澤將兼善於
斯民金玉之聲已聳聞於海內承風竊抃馳慶未遑辱
牋問之先臨荷謙私之過厚佇膺大任以耀吾儒瞻頌
之勤敷宣曷究

回王郎中

右某言念幸居仁里久服於聲猷邈守官箴阻親於風
矩徒積懷賢之素闕伸置牘之儀豈意撝謙遠貽榮翰
欣審頒條之暇妙臻視履之祥恭惟某官才識高時公
忠奕世屢領蕃宣之寄浸深旒宸之知側聽褒遷式符
瞻頌披承尚阻保鍊為宜

別京東監司赴西臺

右某啟綿力支離輒露投閒之請綸言溫厚遽推從欲

之恩事與願諧感深涕下伏念某賦性迂闊遭時盛明
徒以家聲早塵器使諫垣將幕曾屢試以無堪澤國山
城迨三黜而何補以勤裨拙沈迷簿領之勞有過知非
憔悴風濤之險尚獲神明之殛再罹嗣息之殃悲苦纏
心驚惶失志畏郡條之瘵曠累部使之庇容陳力知難
叫九閭而瀝懇量能授職叨一札以頒榮解劇東藩分
班西洛身閒名美猶肅臺儀祿厚責輕真同吏隱此蓋
某官義均錫類德重包荒曲全衰晚之蹤俾追譴訶之

域青泥脫翼敢忘吏部之仁斗水活鱗永識監河之賜
載思感遇罔罄敷陳

到河中謝雍帥劉龍圖

右某祇奉朝恩誤膺州寄獲依大庇竊抃下風恭惟某
官盛德映時英猷冠古夙蘊致堯之業暫膺分陝之權
化茂棠陰已坐康於疲俗寵登槐府行入贊於重熙某
受命云初棲蹤有幸尚祈葆輔式副傾瞻

謝延帥太尉

右某祇受朝恩誤膺州寄獲依大庇竊拊下風恭惟某
官勲業光朝公忠映古顯被凝旒之眷寵分推轂之權
仗鉞專征久已寬於宵旰追鋒促召行入贊於樞機某
受命云初趨承尚阻更祈葆輔式副傾瞻

謝提舉茶場陸奉議

右某祇奉朝恩誤膺州寄獲依大庇竊拊下風恭惟某
官蹈道深醇賦才英敏夙蘊經綸之業早膺簡注之求
攬轡宣風已坐豐於邦計泥封促召行入踐於禁林某

受命云初棲蹤有幸尚祈葆輔式副傾瞻

回同州知府朝請

某忝恩移郡揆日頒條隣大國之樂封託洪河之餘潤
恭惟某官清規表俗雅望映時被乃聖之深知膺惟良
之優寄佇還近侍式協僉言某脫駕方初瞻風徒切未
伸竿牘之懇遽貽金玉之音愧荷所叢敷陳罔罄

謝陝州知府大夫

某比者蒙恩假守取道之官既獲望於下風復驟承於

異眷伸講故人之好盛敦主禮之優逮爾睽違徒布龔黃之治入參近侍行並徐嚴之游某方稅單車適遙外屏未綴荒蕪之懇先垂華藻之音愧荷所叢敷陳罔罄

回新鳳翔知府范學士

某分符守郡竊愧誤恩揆日頒條獲遵成矩內惟天幸益仰賢標恭惟某官厚德鎮浮高才名世早升華於禁省已深東於帝心屢殿大邦藹聞佳政側聽鋒車之召入陪法從之嚴某稅駕方初瞻風徒切置牘之儀未展

摘華之問遽臨荷謙眷之過隆祝珍調而倍切載惟欽
頌曷罄敷宣

回大寧知監張奉議

右某分符守郡揆日頒條懼衰拙之瘵官愧朋知之為
地未馳謝懇遽辱榮音荷謙眷之載隆企賢風而增慕
方賒晤對更冀保調佇迂寵休式符言願

到慶州謝兩府啟

左僕射

衰年屏迹漸謀三逕之歸邊鎮分符誤被一麾之寄寵
還近職榮屆舊邦光輝已逮於覆盆歲月徒驚於過隙
載量忝冒唯極震驚伏念某錄錄無能規規自守涉世
但憂於蒿目觀時獨苦於蓬心入備諫臣言未良於藥
石出宣使指功莫著於涓埃幅巾將遂於息肩窮巷惟
期於沒齒假麾便郡聊燕息於河濱易地名藩使折衝
於境外此蓋伏遇某官夾輔王室澄清化源端委巖廊
大任方隆於柱石和調鼎鉉元功已格於鹽梅啟沃清

裹甄收舊物顧未捐於弱植誠有自於洪鈞晚歲無聊
從事已逾於三黜壯心未已乘時猶效於一鳴過此以
還未知所措

右僕射

河濱樂土方忝於郡章閭外名藩遽持於兵柄念流年
之遲暮還內閣之榮華固陋何勝彷徨失措念某伎能
謫薄藝業迂疎學未啟於斲輪才已慚於投刃涖官行
法苟全最爾之軀問舍求田常有終焉之志偶蒙收用

未忍棄捐禁閨圖書重討論於簡牘邊陲斧鉞方鎮遇
於羌戎此蓋伏遇某官一代名臣三朝耆德廟堂決策
忠言切於借籌寰海具瞻大任隆於調鼎不忘疎賤獲
被褒升過蒙雨露之恩實自坯陶之力窮通守節志益
固於胷中夙夜服勤功庶期於毫末

右丞太中

憂患飄零分安於退處寵光稠疊特冒於遷升俾還內
閣之華復任連城之重年鬢但驚於晚節山川無改於

當時恩大莫量懼無以稱伏念某才非應變學昧向方
得從諸彥之游適際千年之運擢居言職未能補過而
拾遺彊赴吏功不事循名而責實空踰二紀無補萬分
乞身猶幸於息肩固位敢希於投足盛時易失久絕望
於彈冠舊物不忘猶見收於墜履此蓋伏遇某官保佑
一德協和庶方獻納嘉謨奉兩宮之清問弛張大政宜
四海之具瞻英賢方處於廟堂朽質誤分於印組桑榆
暮景雖自愧於衰遲金石素心誓不忘於顛沛

門下侍郎

司文禁閣載領於簡編假守名藩謬分於印紱過隙但
驚於歲月據鞍重攬於山川自顧瑣微何勝眷任伏念
某粗觀章句偶繼簪紳賦蕞爾之小才乏超然之遠識
一從吏役常寄迹於萍蓬久負歸心欲置身於桑梓衰
颯已隣於暮齒施為何益於秋毫出守蒲津聽訟唯期
於卧閣統臨榆塞觀風遽效於褰帷此蓋伏遇某官望
重本朝功深名教道兼資於文武學洞達於古今歸卧

里間謝萬鍾之厚祿進登廊廟為一代之宗臣某愧懼
悴之餘生沐便蕃之異數宣揚明詔思惠養於疲民推
廣上仁務懷來於遠俗

中書侍郎

退安散地雖自棄於明時假守舊藩蓋曲頒於異數職
載升於禁閣任兼擁於連城內典圖書出持符印故物
未忘於墜履餘光俄照於覆盆伏念某學未知方才非
周用投身斥澤豈慕於鷗鵬竊食太倉僅同於雀鼠久

叨任使何所建明流年漸迫於桑榆衰髮已先於蒲柳
出麾河上安閒頗類於幽居促駕塞垣委寄獨司於戎
事此蓋伏遇某官發揮王度裁決政機治達本源兆姓
共勤於農畝謀無遺策四方咸偃於德風致此孱虛竊
膺褒異保完瘡痍固無間於邇遐勉勵筋骸敢自寧於
夙夜

樞密

優游便郡乞身將賦於歸田繁會名區受詔俾專於持

節翰墨方還於近職旌旗復指於舊邦揣已若驚不寒
而栗伏念某學未窺於堂室器自局於斗筭誤被選掄
久更任使驅馳郡國不知髀肉之消苒荏歲時但覺鬢
毛之改數罹憂患自請退閒息駕河濱得逍遙於外補
守藩關外俄統制於中權此蓋伏遇某官平格治功裁
成武德講明萬化常進對於前旒討治五兵欲懷來於
左衽顧茲重鎮尚畀非才莫量天地之私實出陶鈞之
力發生朽質終有待於再榮淬礪鉛刀用或堪於一割

副樞

專城假守方退食於河濱內閣升華遽剖符於關外遲
暮但慚於白首褒遷更累於清時伏念某固陋鄙人飄
零疎跡悟意濫階於朝位奮身本出於儒家游宦積年
坐費太倉之粟躬耕有日行尋負郭之田厭俯仰以隨
人聊優游而卒歲豈宜疎遠輒冒寵榮此蓋伏遇某官
協贊九功輔成一德干戈不試獨先堂上之兵夸狄來
庭潛契幄中之算顧惟邊寄尚付瑣才方隅得預於守

藩廊廟實資於推轂高臺未輟收功終累於九層末路
爭先駕力尚期於十駕

賀左僕射蔡相公

伏審進被命書首登宰席顯赫上公之任澄清大政之
原羣生咸賴於陶鈞盛禮方脩於典冊伏惟慶慰恭以
僕射門下相公學臻聖間道協昌期久平格於泰階實
勤勞於王室居調玉鉉已寅亮於九功榮被袞衣永總
司於百揆某誤分印紱久沐陶甄三事登朝喜平津之

開閣一麾出守阻魏勃之掃門

賀右僕射中書韓相公

伏審寵膺冊命進位鈞衡內親附於兆民外懷柔於四
國大賢登用衆望攸歸伏惟慶慰恭以某官學洞九流
智周萬變久居宥密克壯謀猷光華果陟於公台感會
潛符於夢卜君臣堂陞素尊用於鼎司伯仲埶簞遂同
陞於袞職某侵尋末路瞻企餘光假守西陲偶坐縈於
符竹緬懷東閣阻進預於簪紳

賀樞密章通議

伏審進被寵榮超升宥密內以講脩於七德外將震疊
於四夸應率土之具瞻喜大賢之登用伏惟慶慰恭以
某官機籌獨運文武兼資挺生杞梓之材蔚為廊廟之
器果由省闈入踐樞庭協贊治功久預裁於國論發揮
雄略遂專決於兵謀聖時方偃於干戈寵任爰資於柱
石某偶分重寄得附餘光堡戍臨邊方假一麾之守冠
裾就列阻瞻數仞之牆

賀門下司馬侍郎

伏審進被絲綸入登廊廟將致君於堯舜當並駕於伊
周方日月之光明宜風雲之感會伏惟慶慰恭以某官
行造聖蘊學為儒宗不繫意於窮通久忘言於用捨幅
巾去國燕居將老於洛濱端委造朝大任爰參於鼎足
某側聞新命幸處洪鈞關塞一麾符印尚縻於尺組山
川千里門闌阻曳於長裾

呂左丞光祿

伏審光被絲綸參居衡軸內講明於法度上調變於陰
陽宜四海之具瞻喜大賢之登用伏惟慶慰恭以某官
直而不撓靜以有謀智周事物之原學貫天人之際出
宣藩翰暫分寄於銅符進陟廟堂載入司於玉鉉某喜
聞休命獲處洪鈞違離已歎於累年眷待嘗蒙於一顧
山川脩闊但託意於歸鴻門仞深嚴阻進趨於行馬

回田總管黃走馬張機宜

右某祇奉朝恩復叨邊寄幸朋僚之有賴顧衰拙以何

堪豈意謙私首貽榮翰辱寵褒於華袞荷重惠於兼金
展晤匪遙保頤為祝

謝提舉茶場陸奉議

比者叨奉上恩併還舊秩棲迹尚叨於封部茲行誠賴
於廕庥揣拙分以逾涯奉訓辭而曷稱此蓋某官義深
錫類德盛包荒軫舊物而不遺借片言而為寵致茲衰
晚復被東求社木百圍既久慚於無用鉛刀再割諒難
必於收功屬便道以之藩阻趨塵而拜賜載惟感戀曷

罄敘宣

回步軍苗太尉

右某比者誤被朝恩再膺寵寄邑里尚存於故老山川
復覩於舊封顧遲暮之何堪蓋獎存之有自伏惟某官
沈潛妙算卓犖英才擁旌久握於帥權出塞屢分於將
鉞折衝萬里指點虜於掌中制勝兩楹出奇兵於堂上
職嚴武衛任總師干軫舊物而不遺借片辭而為寵致
茲忝幸曷稱眷私未遑置牘之儀先辱貽音之及載惟

感頌曷罄敘宣

賀秦州范龍圖

伏審光被命書出臨藩閫飭轅門之三令懷屬幕之諸
戎側聞屏翰之賢深協搢紳之望伏惟慶慰恭以某官
才兼文武學洞古今衣冠有待於宗師宇量素懷於遠
業麟符守土已載領於旌麾虎節治兵果嚴持於斧鉞
巨鎮昔推於秦隴提封密邇於河湟壯樓堞以連城列
鍵橐而夾轂某幸聯末契竊慶異恩屬部歡迎望朱轡

而入境故人登用思白首以彈冠瞻詠之勤敘陳難既

賀秦州吳待制赴闕

伏審光膺詔札入覲宸廷造朝榮踐於文昌解組遽違
於邊服伏惟戶部侍郎誠開金石文麗丹青啟密勿之
嘉謀處光華之近列分權龜紐時未歷於再朞賜對龍
墀顧已深於三接未遑贊善先沐惠音聞六轡之啟行
屬九秋之方晏勉其保嗇聊慰繫瞻欣戀至深序陳莫
罄

太原到任謝宰相執政

右某啟比膺恩制就易師權仍增書殿之華適付屏門
之重辭榮莫遂彌劇愧慚泣職云初率皆忝冒此蓋某
官代工有體全舊為心忘其齒髮之衰付以兵民之寄
初臨藩鎮唯祇畏於簡書夙恃鈞庥更仰資於廟略瞻
頌感激實倍常情

回知鄭州陳龍圖

分服鄉邦方慚竊祿易麾邊閫彌愧優恩宣上化以方

初企高風而徒切某官忠良挺操愷悌存心久翔侍從
之華屢寄藩宣之重未遑馳問先辱緘滕感佩攸深敷
宣罔罄

回延帥趙端明

伏審中權報政秘殿升華矧惟耆哲之賢益重專征之
寄高才映古重望冠時久參法從之榮夙寄長城之任
果膺異數益簡上心竚奉綸言別登柄任顧慶儀之未
展辱榮問之先臨感愧兼深敷陳罔罄

西京韓相公賀冬

伏以陽德方升振嘉生於潛戶天端首正候祥氣於迎
雲恭惟某官望重累朝德尊元老方告猷而翊國暫均
逸於留都坐推及物之仁茂集履長之慶顧惟衰跡遠
託餘庥瞻頌攸深敷陳罔罄

賀中書僕射劉相公

伏審典冊告廷公台進位欽聆褒制均慰輿情恭惟某
官川嶽儲靈珪璋挺瑞懷久大之賢業際光華之盛時

出入三朝始終一節逮真人之訪落陪機事之贊襄德
合天心功符世賴具瞻隆於民望注意簡於宸衷果膺
夢卜之求入正鈞衡之任延登揆路升踐宰司論道經
邦告嘉猷於我后奮庸熙載下膏澤於斯民益隆乃聖
之知永輔太平之運屬居藩服阻慶賓閎置牘翹誠敷
文罔喻

賀蘇右丞

伏審光膺制命進轄文昌三事得賢萬方交慶某官德

器端重學術淵深體明哲之姿挺直方之操進退不更
其守言行必本於忠啟沃聖心尊崇王度果繇中憲入
預政機蓋人望之久稽故輿情之共快載惟欽仰倍越
常倫

簽書樞密王密學

伏審顯膺制綍榮貳鴻樞簡自上心協于僉論某官高
才映世直道事君維古訓而是經輔聖猷而濟美果繇
天府入掌機衡躋侍從之清班未容溫席參弼諧之近

列寔慰具瞻某適遠賓閣阻通慶謁欣企之素敷叙奚
周

回工部李侍郎

恭審光膺中詔進貳冬官當賢哲之彙征實朝廷之盛
事行登近列益副僉言未遑簡牘之脩先辱緘滕之貺
愧銘交至敷敘奚殫

賀趙內翰

伏審光奉制恩榮登翰苑豈特儒林之推重固宜國體

之增華邦寵既行朝僉胥慰某官器深且博德厚而淳
薰然君子之慈隱若大儒之效果膺芝檢入掌辭林典
章暫繫於發揮民物尚需於康濟顧未遑於脩慶愧先
辱於貽賡欣感攸深敷陳曷罄

賀知定州許資政

伏審懇辭機務榮殿名藩爰擇剛辰已開盛府諒惟慶
慰恭以某官純誠亮直和惠敦方重望鎮時精忠體國
雅挾佐王之畧克成輔世之功名以盛而不居賢因勞

而思佚暫繫舊德坐鎮朔陞方布上恩已聞於美政再
調元化行副於具瞻竊幸衰蹤匪遙善庇方積懷賢之
抱先煩置牘之儀感愧兼深敷陳罔罄

回文太師

伏審連上奏封懇還政柄雖勞謙之曲至顧體貌之方
隆況已協於康寧敢與聞於去就伏惟某官道行當世
名軋古人早得位以濟時晚未忘於憂國奇兵不再建
宗社之元勲大節可書作邦家之盛福親輔三朝之治

尊為萬乘之師會初政之清明因上心之恭默爰起大
老以圖久安天下想聞其風廷臣無出乎右長城在望
坐消邊境之虞寶鼎復來自使朝廷之重偶愆和豫稍
倦晨昏浩氣內融明神陰相不假蓍龜之卜已聞藥石
之功遽辱誨音願從高退然而公旦雖老不離成周山
甫就封永懷王室蓋義之所在則雖出猶處道可以進
則當止而行矧五詔之丁寧而兩宮之倚注欲立非常
之事方須不世之謀曾是弱姿徒煩委教再三加命雖

逾考父之恭九十在公尚覺鬻熊之少願回冲挹以就
太平

謝同知樞密院

右某啟輔弼之任必唯其人樞機之權尤慎所與蒙恩
忝冒撫已震驚伏念某賦命數奇受才不敏學古雖專
而疎於接物更事徒久而昧於趨時唯知義命之安敢
意功名之會值遭興運拔擢過優豈茲一介之微可陪
三事之列南箕之名匪實鼯鼠之技易窮自知甚明懇

辭弗獲莫回成命終冒殊私深虞竊祿之譏曷副經邦之望此蓋伏遇某官權衡萬物高下一心廊廟之間材適長短之用陶鈞之內器無苦窳之嫌致此孤生驟當大柄敢不勉濟協恭之義益堅許國之心仰稱茂恩用醕洪造感銘之素敷敘奚周

又

比者祗膺告命獲貳樞庭越次而居殆非其分徒深形於懇避終進冒於恩榮伏念某學古甚迂承家不克偶

緣際會亦預招延少也無成蓋乏適時之畧長而不偶
殆繇接物之疎空歷四朝未聞一善敢祈晚節併被殊
私進以美官還之要地清途入踐未逾三月之賒機事
與聞乃筮八人之列靖言非據靡自遑安此蓋某官道
可濟時心唯體國謂技能之雖少且事任之常更陰借
品題使階進用智謀非遠知難就於功名忠義在前敢
自羞於門戶庶幾小補永服下風

賀知河中府王待制

伏審光奉詔綸進居文閣既遷升於顯地復鎮守於名區伏惟慶慰恭以某官道極淵源學臻堂奧廓高明之遠識挺卓越之宏才嘉謨沃於上心儒術施於吏事披文禁闥遂從金馬之游問俗大邦方任銅魚之寄某久嗟離闊載預交承向風但切於馳情晤語未期於促膝喜聞持節莫遂造門思詠良多敘陳難既

范忠宣集卷八

欽定四庫全書

范忠宣集卷九

宋 范純仁 撰

經解

進尚書解

臣近奉德音俾將前世君臣議論諫爭之言編次進呈
臣以史籍浩博采掇未能遽就而君臣之際莫盛於堯
舜三代故取尚書自古君臣相飭戒之言關於治道者
錄為三十章仍於每章之後輒有解釋或用孔氏注意

或與孔說不同但取理當義通以伸裨補之誠幸陛下
赦其愚而少垂采擇亦聖人不以人廢言之義也

堯典

堯曰咨四岳湯湯洪水方割蕩蕩懷山襄陵浩浩滔天
下民其咨有能俾乂僉曰於鯀哉帝曰吁咈哉方命圯
族岳曰異哉試可乃已帝曰往欽哉九載績用弗成

臣某曰堯知鯀方命圯族而終以四岳之言而用
之至于九載然後殛之可以見聖人不以已之智

識出倫過人而違衆獨用也又不以一絲不職而遽易三考黜陟之法也蓋人以久則可責其成功若歲月不久而中易不唯大功不成而黜者亦得以為辭然非堯德之大孰能容之故曰唯天為大唯堯則之也

大禹謨

禹言於舜曰后克艱厥后臣克艱厥臣政乃乂黎民敏德帝曰俞允若茲嘉言罔攸伏野無遺賢萬邦咸寧稽

于衆舍已從人不虐無告不廢困窮惟帝時克

註云帝謂堯也

臣某曰孔子曰為君難為臣不易如知為君之難也不幾乎一言而興邦乎又君牙曰思其難以圖其易民乃寧故雖舜禹在上而不敢忽天下之務復相戒以艱難信乎君臣之不易也善言不隱則賢者皆進用衆捨已則君上無過困窮不廢則不困窮者可知以舜之大聖而稱此可見惟堯為能又見乎為君之難也

益曰吁戒哉儆戒無虞罔失法度罔遊于逸罔淫于樂
任賢勿貳去邪勿疑疑謀勿成百志惟熙罔違道以干
百姓之譽罔拂百姓以從己之欲無怠無荒四夷來王
臣某曰有憂虞而後戒捨法度而自任留心于樂
逸任人以疑貳忘道以求名違衆以徇己皆中主
之所不為而益以戒舜可見古之君臣相戒深切
而益能盡言舜能善聽也匹庶不以善鬪服隣里
王者不以善戰服戎狄唯無怠荒庶政脩舉則夷

狄自賔

臯陶稱舜曰帝德罔愆臨下以簡御衆以寬罰弗及嗣
賞延于世宥過無大刑故無小罪疑唯輕功疑唯重與
其殺不辜寧失不經好生之德洽于民心茲用不犯于
有司

臣某曰孔子曰寬則得衆易曰乾以易知坤以簡
能有以見居上不以寬則刻急而鮮仁臨下不以
簡則叢脞而害政唯好生之德可以服民心民心

服則有恥而從化自不犯於有司矣

舜曰咨禹唯時有苗弗率汝徂征禹乃會羣后誓于師
曰濟濟有衆咸聽朕命蠢茲有苗昏迷不恭侮慢自賢
反道敗德君子在野小人在位民棄不保天降之咎肆
予以爾衆士奉辭罰罪爾尚一乃心力其克有勲三旬
苗民逆命益贊于禹曰惟德動天無遠弗届滿招損謙
受益時乃天道帝初于歷山往于田日號泣于旻天于
父母負罪引慝祗載見瞽瞍夔夔齋慄瞽亦允若至誠

感神矧茲有苗禹拜昌言曰兪班師振旅帝乃誕敷文德舞干羽于兩階七旬有苗格

臣某曰禹受舜命徂征有苗聞益之言遂拜而班師信乎能取善而不以已智自任矣舞干兩階而有苗遂格信乎文教之可以服遠至誠之可以感物矣後之人君有興甲兵危士民與異類爭一旦之命使生靈肝腦塗地而欲安民阜俗不亦遠乎

臯陶謨

臯陶曰都慎厥身脩思永敦敘九族庶民勵翼邇可遠
在茲禹拜昌言曰兪臯陶曰都在知人在安民禹曰吁
咸若時惟帝其難之知人則哲能官人安民則惠黎民
懷之能哲而惠何憂乎驩兜何遷乎有苗何畏乎巧言
令色孔壬臯陶曰都亦行有九德亦言其人有德乃言
曰載采采禹曰何臯陶曰寬而栗柔而立愿而恭亂而
敬擾而毅直而溫簡而廉剛而塞彊而義彰厥有常吉
哉日宣三德夙夜浚明有家日嚴祇敬六德亮采有邦

俞受敷施九德咸事

臣某曰夫脩身必在慎思久行慎思則無悔久行則人信然後可以厚族人而善人皆勉思翼戴矣自近及遠之道在此而已知人之難宜察以事而象恭滔天巧言令色者聖人尚或畏之取人之道不可不廣故於九德各取其所長但人君能合而用之則九德皆見於事為矣

又曰兢兢業業一日二日萬幾無曠庶官天工人其代

之

臣某曰夫幾微之不可以不慎也以舜禹之聖尚兢兢業業一日二日而至萬事矧後世之君哉

天聰明自我民聰明天明畏自我民明威

臣某曰聖人以民之視聽為天之視聽故萬事不可不察於民也則民之可畏如畏天矣故曰可畏非民則君之施於民者可不慎哉

益稷

禹曰都帝慎乃在位帝曰俞禹曰安汝止惟幾惟康其
弼直惟動不應僉志以昭受上帝天其申命用休帝曰
吁臣哉隣哉隣哉臣哉禹曰俞帝曰臣作朕股肱耳目
臣某曰夫止者所以制動也人君不先自安所止
則好惡無節矣是以君正則臣直先安其止而動
則天下大應之然後可以明享上天之休命夫君
臣相親則萬事治宜其舜之再言而喻以手足耳
目也

禹曰俞哉帝光天之下至于海隅蒼生萬邦黎獻共惟
帝臣惟帝時舉敷納以言明試以功車服以庸誰敢不
讓敢不敬應帝不時敷同日奏罔功

臣某曰萬國衆賢皆帝之臣在帝能舉而用之爾
進之以言試之以功然後賞之以車服既明試之
有法則羣臣孰敢爭先而進乎孰敢不謹奉於職
乎向若舜不如此施為使賢愚同進則宜其無成
功矣

帝庸作歌曰敕天之命惟時惟幾乃歌曰股肱喜哉元首起哉百工熙哉臯陶拜手稽首颺言曰念哉率作興事慎乃憲欽哉屢省乃成欽哉乃賡載歌曰元首明哉股肱良哉庶事康哉又歌曰元首叢脞哉股肱惰哉萬事墮哉帝拜曰俞往欽哉

臣某曰股肱之臣喜於任事則君德日起而百官安職矣臯陶復戒舜以興作宜慎法度而屢加省察迺有所成君有明德則良臣獲進君道煩細則

萬事墮情此有虞君臣相戒之言萬世之成憲也
可不慎哉

五子之歌

太康失邦兄弟五人須于洛汭作五子之歌

太康尸位以逸豫滅厥德黎民咸貳乃盤遊無度畋于
有洛之表十旬弗反有窮后畀因民弗忍距于河厥弟
五人御其母以從徯于洛之汭五子咸怨述大禹之戒
以作歌其一曰皇祖有訓民可近不可下民惟邦本本

固邦寧予視天下愚夫愚婦一能勝予一人三失怨豈
在明不見是圖予臨兆民懷予若朽索之馭六馬為人
上者奈何不敬

臣某曰孟子曰得其民斯得天下矣則民為邦本
也宜矣又曰得其心斯得民矣則可近而不可下
也明矣夫人君處於億兆之上而安者非力能制
億兆之人也所恃者上下之分君臣之義耳以分
義之微而馭兆人何異朽索之馭馬哉苟君失其

道則匹夫皆可以勝之矣大凡不明之怨其怨必甚故杜牧言秦民不敢言而敢怒也故聖人達民之情而宣之使言所以圖怨於未見之前也禹不獨行於其身又以訓後嗣慎哉

仲虺之誥

惟王不邇聲色不殖貨利德懋懋官功懋懋賞用人惟已改過不吝克寬克仁彰信兆民

臣某曰夫聲色貨利人皆好之惟聖人為能無欲

用人如己則心一而無疑間故動有成功夫以成湯之德不以無過為美而以改過為美不以法令服民而以寬仁彰信於民則聖王所行與夫申韓雜家之說異矣

又曰德日新萬邦惟懷志自滿九族乃離王懋昭大德建中于民以義制事以禮制心垂裕後昆予聞曰能自得師者王謂人莫己若者亡好問則裕自用則小

臣某曰聞善不懈則德日新矣謂人莫己若則志

自滿矣以義制事則不自任矣以禮制心則無暴慢矣屈己取人則能自得師矣故孟子曰大有為之君必有所不召之臣若謂人莫己若則人之善言皆不可入矣人之善言不可入則過失雖多而不聞矣怨怒雖盈而不恤矣如此者不亡何待好問而行則合取衆智而過不在己豈不裕哉自用則專其私意而過必歸己豈不小哉

湯誥

湯曰其爾萬方有罪在予一人予一人有罪無以爾萬方

臣某曰孟子謂治人不治反其智夫金不成器由陶冶之不良也民不為善由教化之未至也故萬方有罪罪不在民而由上之德有所未孚爾然則禹湯罪己亦其誠矣

伊訓

伊尹訓太甲曰先王肇脩人紀從諫弗咈先民時若居

上克明為下克忠與人不求備檢身若不及以至于有萬邦茲惟艱哉敷求哲人俾輔于爾後嗣

臣某曰夫從諫弗拂而古人是若則君道明矣與人不求備則能任人之長檢身若不及則喜聞己之短任人之長則人盡其才聞己之短則己將無過夫為人上使己無過而人盡其才天下安有不治者哉

又曰爾惟德罔小萬邦惟慶爾惟不德罔大墜厥宗

臣某曰君不厭小善則可以成大德故為天下之慶不恤小惡則可以成大禍故墜厥宗有以見人君不可以小事忽於聽納而憚於更張也

太甲中

伊尹曰脩厥身允德協于下惟明后

臣某曰傳曰脩己以安百姓堯舜其猶病諸故人君不脩身則百姓不信其命令故須先脩身使己之德信於天下則民從而化之迺為明主

又曰無時豫怠奉先思孝接下思恭視遠惟明聽德惟聰朕承王之休無斁

臣某曰見近效而忘遠圖視不明矣聽近習而疑君子聽不聰矣惟能見遠大者為明能聽有德者為聰則君道之美垂無窮矣

太甲下

伊尹訓太甲曰若升高必自下若陟遐必自邇無輕民事惟難無安厥位惟危慎終于始有言逆于汝心必求

諸道有言遜于汝志必求諸非道嗚呼弗慮胡獲弗為
胡成一人元良萬邦以貞君罔以辯言亂舊政臣罔以
寵利居成功邦其永孚于休

臣某曰升高自下陟遠自近蓋言人君之德以積
累而成庶事皆有漸也夫民事至重不可以輕舉
尊位至危不可以驕處凡人之情喜於合已故迎
合之人易進惡於異已故忠直之言難入苟非明
君以道而求其心則邪正亂矣君好以辯言拒臣

下則臣下之情不能盡臣下之情不盡則政斯亂
矣

咸有一德

伊尹曰嗚呼天難諶命靡常常厥德保厥位厥德匪常
九有以亡夏王弗克庸德慢神虐民皇天弗保監于萬
方啟迪有命眷求一德俾作神主惟尹躬暨湯咸有一
德克享天心受天明命以有九有之師爰革夏正非天
私我有商惟天佑于一德非商求于下民惟民歸于一

德德惟一動罔不吉德二三動罔不凶惟吉凶不僭在人惟天降災祥在德今嗣王新服厥命惟新厥德終始惟一時乃日新任官惟賢材左右惟其人臣為上為德為下為民其難其慎惟和惟一德無常師主善為師善無常主協于克一

臣某曰聖人久於其道則為恒德在易恒卦之初則曰浚恒貞凶象曰浚恒之凶始求深也故人君欲行恒久之道不宜深求於其初則人情不擾而

位可保也夫君臣一德則動而獲吉能當天心故
武王曰予有亂臣十人同心同德又曰予有臣三
千惟一心致一之道在人主推誠待下無偏無黨
則衆心咸服故能一矣

又曰后非民罔使民非后罔事無自廣以狹人匹夫匹
婦不獲自盡民主罔與成厥功

臣某曰人君自廣以狹人則羣下之情不通一夫
一婦不能自盡其情人君猶不能成功況士大夫

乎

說命上

高宗命說曰惟暨乃僚罔不同心以匡乃辟俾率先王
迪我高后以康兆民嗚呼欽予時命其惟有終說復于
王曰惟木從繩則正后從諫則聖后克聖臣不命其承
臣某曰人君不以納諫為難而以從諫為難能從
諫則羣臣之善皆歸於君矣合天下之善以為政
安有不聖乎

說命中

說進于王曰嗚呼明王奉若天道建邦設都樹后王君
公承以大夫師長不惟逸豫惟以亂民惟天聰明惟聖
時憲惟臣欽若惟民從乂惟口起羞惟甲冑起戎惟衣
裳在笥惟干戈省厥躬王惟戒茲允茲克明乃罔不休
惟治亂在庶官官不及私昵惟其能爵罔及惡德惟其
賢慮善以動動惟厥時有其善喪厥善矜其能喪厥功
惟事事乃其有備有備無患無啟寵納侮無恥過作非

惟厥攸居政事惟醇黷于祭祀時謂弗欽禮煩則亂事
神則難王曰旨哉說乃言惟服乃不良于言予罔聞于
行說拜稽首曰非知之艱行之惟艱王忱不艱允協于
先王成德

臣某曰天之聰明廣大含容故人君當法則之夫
號令不慎則貽羞辱甲兵不慎則召寇讐衣裳當
擇人而後賜干戈必省己而後動君能信此則無
不休美夫官及私愛則士不勸爵及惡德則民不

安慮事不可以不善舉動不可以不時矜能眩智者自滿之道事事有備者消患之本寵小人者欺罔之言日進非納侮而何志欲革俗而嗜好不免同俗非恥過作非而何傳說陳此言高宗信而服行之猶曰非知之艱行之惟艱可見賢臣戒君之深切也行此數事而中興商祚可見王道之簡易也

說命下

說曰王人求多聞時惟建事學于古訓乃有獲事不師古以克永世匪說攸聞惟學遜志務時敏厥脩乃來允懷于茲道積于厥躬惟數學半念終始典于學厥德脩罔覺監于先王成憲其永無愆惟說式克欽承旁招俊乂列于庶位

臣某曰夫人君不可不學不學則聞見狹而智不明聞見狹則遠大之言不能用智不明則邪佞之說易以欺況天下之廣萬務之衆不可率己意而

治之必當稽先王之成法莫大乎堯舜禹湯文武
周孔之道人君信懷此道積于其身使邪說異行
不能惑亂然後廣用賢俊列于衆職而王道成矣
洪範

五皇極皇建其有極斂時五福用敷錫厥庶民惟時厥
庶民于汝極錫汝保極凡厥庶民無有淫朋人無有比
德惟皇作極凡厥庶民有猷有為有守汝則念之不協
于極不罹于咎皇則受之而康而色曰予攸好德汝則

錫之福時人斯其惟皇之極無虐熒獨而畏高明人之
有能有為使羞其行而邦其昌凡厥正人既富方穀汝
弗能使有好于而家時人斯其辜于其無好德汝雖錫
之福其作汝用咎無偏無陂遵王之義無有作好遵王
之道無有作惡遵王之路無偏無黨王道蕩蕩無黨無
偏王道平平無反無側王道正直會其有極歸其有極
臣某曰人君立大中之道則政化平均民不窮天
而俗皆好善是錫五福于天下也上無偏政則人

無朋比而咸趨大中雖有不合于中但未入于咎
惡皆可容而納於中道故孟子曰中也養不中此
之謂矣夫有才有為之士患在行不羞進行不羞
進則挾才為姦足以亂國進其行則其才可用足
以興邦人君又當脩德使正人好于我家然後人
陶善化而下無罪辜人君之心當如止水不作好
惡偏黨其邪正自辨而天下不治者未之有也

旅獒

召公作旅獒訓于成王曰德盛不狎侮狎侮君子罔以盡人心狎侮小人罔以盡其力不役耳目百度惟貞玩人喪德玩物喪志志以道寧言以道接不作無益害有益功乃成不貴異物賤用物民乃足犬馬非其土性不畜珍禽奇獸不育于國不寶遠物則遠人格所寶惟賢則邇人安嗚呼夙夜罔或不勤不矜細行終累大德為山九仞功虧一簣

臣某曰孔子謂使民如承大祭則君之盛德在不

狎侮而成也人之聰明志意惟可用之於道不役於無益之事則百度斯正當以賢者為寶不以珍奇為寶又能不忽細微則大功可成君或不恤小過而憚於改為終將虧損大德九仞之山起於累土或闕一簣則妨成功況甚於一簣者乎

無逸

周公作無逸戒成王曰自殷王中宗及高宗及祖甲及我周文王茲四人迪哲厥或告之曰小人怨汝詈汝則

皇自敬德厥愆曰朕之愆允若時不啻不敢含怒此厥不聽人乃或譸張為幻曰小人怨汝詈汝則信之

臣某曰聖人欲聞其過如此之急也其反身克己如此之深也雖聞怨詈之言不止不怒而又自脩恭德曰朕之過信如此宜其見美於周公而為法於後世也有不信此道之君為人譸張幻惑則信而怒之矣

君陳

成王命君陳曰爾惟風下民惟草圖厥政莫或不艱有廢有興出入自爾師虞庶言同則繹

又曰必有忍其乃有濟有容德乃大簡厥脩亦簡其或不脩進厥良以率其或不良惟民生厚因物有遷違上所命從厥攸好

臣某曰上之化下如風之偃草則上之所向不可不慎也凡有廢興出納之命必與衆人虞度俟其議同而後行之夫忍小則可以成大容衆則可以

成德舉直而錯枉則使枉者直民之從上惟視其所好故孔子曰上好信則民莫敢不用情若以命令驅之而身不自行則民終亦不從也


問命

穆王命伯冏為周太僕正曰慎簡乃僚無以巧言令色便辟側媚其惟吉士僕臣正厥后克正僕臣諛厥后自聖后德惟臣不德惟臣爾無昵于憊人充耳目之官迪上以非先王之典

臣某曰僕臣王之賤官而皆必用正人可見人君左右不可以便辟邪媚之人為僕侍也後世宦官僕侍既乏正人吉士而人君朝夕與處或訪以事則以淺狹憎愛之言開導人主又豈止非先王之典也可不戒哉

右臣竊觀二帝三代君臣議論之際皆言切而意遠宜於後世治亂無不關也而輒釋以愚臣淺陋之言固不能發明奧義惟陛下稽古博達深求其旨則益遠益大

將可以比隆虞夏商周之盛矣惟陛下留神愚臣不勝
大願取進止



范忠宣集卷九

欽定四庫全書

集部

范忠宣集卷十一

詳校官庶吉士臣龍廷槐

檢討臣何思鈞覆勘

總校官中書臣朱鈐

校對官中書臣潘庭筠

謄錄監生臣潘衡

謄錄監生臣王增聞

欽定四庫全書

范忠宣集卷十

宋

范純仁 撰

記

安州白兆山寺經藏記

予自少喜為山水之遊凡所至有名山勝槩雖遐險必
造焉治平二年自侍御史責倅安陸安之西有金峯山
山有古白兆僧寺時道人垂素為之長老而衆皆稱其
名德寺有本朝列聖御書歲時郡遣從事檢校予到官

纔數月遂自求以往至則愛其林泉幽茂蟲谷深邃周
遊登覽而邀素從焉惟法堂土木新詢之則素所營也
予益嘉其必葺又至僧堂北隅有老屋若殿而小視其
榜則經藏也素指謂予曰此雍熙中所建有龔御史石
記在焉然地址隩僻蠹腐所滋遊禮者或不能至將徙
而置於大殿之西爽塏之地而新之予詢其期則曰釋
子舉事待信施而集雖志於有成未可必其期也予移
官去後一紀謫守義陽距安為近地僻少賓友思得素

談老莊而聞其老益高介棄其寺而庵居罕與俗接予
謾以書招之書未達而素已惠然見訪矣語道之暇因
曰昔者欲徙之經藏今已成矣自治平三年冬十月經
始至熙寧四年夏五月告畢計用檀施之材八十萬將
刻石以記歲月願公為我書之予曰師嘗自謂傳達磨
之宗不立語言文字直指心源見性成佛奚取五千之
書而復新其藏為又以一切有為皆如夢幻已則忘之
何用歲月名氏之記而求知於後人哉師曰不然夫衆

生靜明真心與佛齊等由情著於物故翳而為病佛猶良醫知病之本皆稱其淺深緩急為藥以治之今之經猶對病之藥也物之感情無窮故衆生之病無窮則其所治之藥亦無窮此五千之書所以必有也今之經藏猶藥之府也則其棲貯不得不嚴將以應夫病者之求則亦藥之肆也其置設不得不顯此藏之所以必徙而新之也大凡前人有為必告後人以為之之意則庶幾其守而不墜矣此記之所以必作也予聞師之言愛其

有理故為之書元豐元年冬十有一月壬申記

薛氏樂安莊園亭記

蒲舜都也秦分為河東郡地沃人富自漢唐至今為秦
晉之都會固宜人物之多奇也薛氏為河東著姓世有
顯人皇朝樞密直學士樂安公以清德直道事太宗及
真宗皇帝門族尤盛今中大夫公即其第幾子也象賢
繼世詔封五郡三領部使四典巨鎮高識懿行為時名
臣六十而閒七十請老以三品歸第乃於郡郭之東北

披岡帶河擇爽塏之地遠城市之喧築室以居焉因所
封之郡名之曰樂安莊前啟重門內曰含幽閉闕却掃
非幽人佳客履迹罕至南北分為二園其西種杏數百
中曰靜居內外重寢妍華芳卉交植於庭踈竹蕭蕭壽
石雪頂開軒對之各以為名其北曰逸老堂乃公寄傲
宴息之所也其東曰三經堂以藏儒道釋氏之書公以
寄懷於簡冊也其西曰無無堂公自以無欲無營又取
夫莊生之言而名之也東南構亭築址數仞中條太華

列峙如屏其最近者有五老峯因名曰五老榭次東為
臺登覽曠迴清宵月明千里如晝名曰日月臺莊西北
隅據垣乘高下列蔬圃時使老圃村童引水溉畦名曰
瞻蔬臺積土踰尺周植美楸春花夏陰如幄如蓋名曰
楸壇芳條雲布繁英玉坼垂架飄香深若洞戶名曰醑
醑塢脩篁擁徑翠影蒙密新筠解籜嘉色如染名曰猗
猗塢衆木交陰晝不見日清風自來好鳥時下名曰翠
陰塢鑿井轉車以汲甘泉或沈浮瓜李揮弄冰雪或烹

茶煮蔬飲啜醴外設客舍庖廩庫殆將百楹其締
搆製作儉而適用潔而不華夏無蠅蚋之苦冬無風霰
之患其服用皆陶器簞床褐裘葛衣俾君子有以取法
小人無所可欲蓋盡得夫郊居之道或霽色澄明開軒
極望或落花滿徑曳杖行吟或解榻留賓壺觴共醉或
焚香啟閣圖書自娛逍遙遂性不覺歲月之改而年壽
之長也此其遊適之樂居處之安又稱其莊之名矣今
士大夫或身老食貧而退無以居或高門大第而勢不

得歸自非厚積累之德鍾清閒之福安能享此樂哉愚
將老矣固將倣公而退也以人事之難必姑識公之善
處以自勉云公名球字肅之

王尊道先生講學記

古之哲王一道德以同俗故自鄉黨至于國都皆設學
校以教其人凡為士者自少至長必處于學其所學者
惟先王之道則在乎先誠身脩己而後有施于人故其
仕而立于人之朝也則用其所學以事其君而治其民

故其君之所聞者皆先王之道德民之所服者皆先王之教化然後君得以為堯舜之君而民得以為唐虞之民矣自周衰秦漢而後學校養士之法既廢則士之所學不必誠身脩己而各務肆其所為是以邪說怪行得以眩亂乎其間故仕於朝者非一道也致其君者非一術也施於民者無定法也甚則至于國異政而家殊俗矣而欲致其時於堯舜三代不亦難哉今之為士而知斯者有矣患無位而不得言也有位而言者有矣患乎

不能行也若其林野邱園之士能自奮勵篤信先王之道不待上之教化而推其所學以教導於閭里如古之所謂庠序者則見夫滑之胙城尊道先生焉先生讀聖人書窮之三十年五經之旨卓然自得不為諸儒傳注之所牽其言行淳質亦未嘗有繆於道故滑之學者多歸之先生乃為之講解俾識其所趨向又作室以延之而名曰講堂俯堂之北則其先君之墓也或者以為非絃誦之地先生曰吾聞立身揚名所以顯親也吾孜孜

於是道勉其身於君子之途者是使吾親為君子之親也顯孰大焉苟吾親有知聞吾朝夕講聖人之言於此顧不樂哉又況使鄉里之人瞻斯堂則知吾先君之墓則吾親之名蓋亦不朽矣先生以是言語予而欲記焉予昔先生之青衿也其言雖不足發明先生之道而且不敢以辭故因感學校之廢復樂先生能自奮勵以先王之道教導其鄉里而為之記云先生姓王氏名大中尊道即其字也時治平四年九月記

序

司馬公詩序

古之君子脩身以齊家然後刑于國與天下蓋其言動有法出處有常子孫幼而視之長而習之不為外物之所遷則皆當為賢子弟猶齊人之子不能無齊言也書曰積善之家必有余慶詩云貽厥孫謀以燕翼子由此道也端明殿學士司馬公以清德直道名重天下其脩身治家動有法度其子弟習而化之日趨于善蓋亦不

言之教矣又伸之以詩章俾其諷誦警策則其積善貽
謀之道可謂至備宜其子子孫孫世有令人苟尚不能
自脩而入於君子之塗者則其人可知矣宏予之子壻
也持公詩求序於予予樂道公之盛德又因以勉之熙
寧八年月日高平范某序

舊本後有望日示康廣宏
律詩一首今附入第五卷

完美集序

自古國家將興隆平之運建不拔之基者則必上天為
生賢傑之佐啟佑其主戴翊其世而成非常之功故有

商之興也湯得伊尹高宗得傅說周之興也文王得呂
尚宣王得申甫漢之興也高祖得三傑光武得寇鄧唐
之興也太宗得房杜肅宗得郭李故皆能光啟皇圖成
中興王業至于我朝仁宗皇帝享御綿久道冠百王澤
浸四海純誠駿德格于皇天故天將錫我宗以無窮之
祚是生良弼以贊襄大議定策元嗣置天下於泰山之
安神器有覆盂之固時則有若康節張公以清德直道
奮於寒儒歷職試位由河東轉運使入為御史知雜正

色抗論以肅朝政仁宗從諫知臣眷公甚厚公感上知
遇夙夜思報于時國本未立公因啟建儲之議事未果
出典外藩及拜御史中丞復進前說仁宗益愛其言而
將行之遂用公為執政至嘉祐末公既為樞密使長西
府會韓魏公為元宰二府協力以贊丕命英宗皇帝遂
繼大統公之勲烈輝映萬世乃退身養道十有餘年康
寧壽考薨于正寢而朝廷贈有誥謚有議士大夫慕公
之德者哀有詞祭有文及銘於壙紀於碑而狀於太史

者皆所以述公之功德然尚得其髣髴而未之盡也至
今上特題其碑之額曰清忠舊德之碑然後公之大節
於是乎稱矣國家崇德報功之道於是乎備矣天下脩
己為善之人於是乎勸矣一舉而三善從之可不謂之
美歟在昔人臣立大節成大功為天下士民之所稱愛
者未必見知於時君居高位席盛寵蒙遇於時君者未
必見稱於士大夫善其初者未必能保其終盛其名者
未必能安其身如公者兼得而並有之可不謂之完歟

嗣子虞部君集公之贈誥謚議哀辭祭文行狀碑誌為
上下二卷以藏于家以傳于世蓋孝子繼志述事之一
端矣屬某名其集而為之序某以先君文正公有同榜
之契而知公行事為詳義不得辭請名其集曰完美因
以公之大節而敘其說云

銘

布衾銘

藜藿之甘綈布之溫名教之樂德義之尊求之孔易享

之常安綺繡之奢膏粱之珍權寵之盛利欲之繁苦難
其得危辱旋臻取易捨難去危就安至愚且知士寧不
然顏樂簞食萬世師模紂居瓊臺死為獨夫君子以儉
為德小人以侈喪軀然則斯衾之陋其可忽諸

鼎銘

河內之范文正之嗣以薦以享子孫勿墜

青詞

祈雨

天心仁愛遂羣物之長生神道聰明感至誠而善應下
國方罹于耗斂真科曲示於祈禳敢瀝懇以求哀冀轉
留而為福伏念臣欽承君命假領帥權爰當莅職之初
適遇荐饑之後盜賊盈獄餓莩蔽塗賑發將竭於囷倉
疲瘵尚虞於溝壑近從初夏復邁亢陽田野焦枯公私
窮蹙豈斯牲之敢愛曾靡神而不宗徒罄羣心未蒙嘉
澍臣之危懼日甚焚惓疾懸虐之方揚嗟民命之近止
叫閭無路躋地何容是用祇叩琳宮虔遵寶籙降九天

之真聖延三界之靈神恭脩豺獮之誠仰致潢汙之薦
敢冀高穹悔禍上帝垂慈需為三日之霖滌此一方之
沴不違物願咸繫鴻私

刑獄

元功默定顧動植之難量大德好生諒祈禳之可格既
昧效官之術敢忘謝過之心伏念臣領郡再期長人萬
室慎罰固遵於國典用刑恐戾於物情或因繫踰時或
重輕失實或欺誣罔辨或疾苦不聞矧庶獄之繁興豈

斯民之多僻蓋在位乏移風之舉故編氓無遷善之由
積痛憤于九幽貽凶蓄於一境敢伸精禱庶格洪休是
用恪奉仙儀嚴陳法供普祈衆聖延降上真伏願錫福
庶民降康下土滌園扉之寃滯佐比屋之熙淳更願帝
化所陶不犯畫衣之禁民知遠罪常無觸網之愚誓堅
忠孝之誠仰荅乾坤之造

禳謝

大道難名默運生成之化至神莫測潛司禍福之權願

纖介之微軀沐堪輿之大賜敢忘報謝用致忱誠伏念
臣幼服儒風早蒙道廕職免耕桑之苦身無飢凍之憂
親遇聖明官居繁要姻族百口不逢天橫之蓄仕宦四
方常脫傾危之禍報國蔑聞於績效臨民有愧於循良
自知祿厚而才輕惟懼福盈而禍至是用虔依秘範延
降上真勉脩豺獮之誠恭備蘋蘩之薦敢望好生垂德
福善敷恩保家國之和平遂性情之安逸行身迪吉為
道日新悉均動植之倫咸享康寧之福願堅善行仰荅

鴻私

禳謝

大道難名默運生成之化至神莫測誕彰感應之方是以聖賢益務於畏天豺獺猶知於報本竊念臣生居善族親遇明時由父訓以入官荷朝恩而尸祿罪雖多而苟逃禍譴德靡積而濫享休寧豈愚分之能招蓋陰隲之潛佑故敢恭脩薄薦延降上真嚴醺席於中宵遵玄科之往範罔揆幽微之品用伸禳謝之誠伏願諸聖垂

慈明靈洞鑒察丹衷之懇懇錫多福之穰穰庶乎家族
平康身心安泰長幼罔罹於菑害公私常免於訟刑誓
堅為善之誠仰荅難諶之造

禳謝

大德難名運真功於不宰至誠有感通神化以無方敢
稽金簡之明科延降玉虛之真聖恭脩薄薦庶達微誠
伏念臣生遇明時幼聞義訓紹簪纓於仕族竊台鼎之
榮名脩己安人既慚于成德代工理物固乏於周才常

虞厚祿以貽殃每懼器盈而致覆哀疲感疾蓋盡瘁而弗勝早曠興蓄亦變調之無效徒欲報君而竭節復嫌冒寵以妨賢進退惟艱憂思曷濟是用虔遵寶籙恭啟蘭場祈元造之垂慈覬上靈之敷佑庶俾道由天相輔聖化以無虧善克世傳守先猷而不墜然後閨門舉族共臻安泰之祥蒲柳餘生早遂退閒之福誓堅素守仰答鴻私

禳謝

洪造無私雖不言而示化至神莫測諒有感而必通虔
遵金簡之儀仰叩璇穹之聽伏念臣幼承道廕長遇聖
時荷恩眷於累朝叨顯榮於三事常念滿盈之戒每希
止足之心爰自去年得辭大政既免觸藩之困幸逃覆
餗之羞雖嘗遘於菑屯亦屢銷於禍釁用舍偶完於素
節退休將遂於本心豈愚慮之能周實神靈之陰相是
用罄伸丹懇歸命上真尚虞衰晚之多艱猶覲保全於
終吉更願身心康樂家國安寧子孫蒙德慶之祥骨肉

享安平之祉早遂引年之請咸蠲違道之愆俾於衰暮之齡錫以清閒之福臣敢不服膺聖訓克意善經盡蒲柳之餘生答乾坤之大賜

禳謝

洪造難諶降災祥而在德至神莫測召禍福以唯人積行累功當效聖師之久禱識昏情蔽敢云愚慮之無愆故僊經開禳謝之科禮典有報祈之祀罔揆桑榆之景輒脩豺獮之儀仰叩高真歸依妙教伏念臣生蒙道廕

品與最靈繼承慶善之門遭遇聖明之世歷塵仕路兩
玷宰司有位無能虛名過實既乏致君之畧曾微及物
之功矧復形憊而神消齒衰而耄及或刑賞之失當或
議論之過中流弊久長貽留匹庶自難知覺釁積纖微
尚逃尸素之誅獲全進退之分豈圖殘朽猶覬安全蓋
君父之深恩亦神靈之密佑敢不追循往咎懺謝前愆
誓堅止足之心永絕貪私之妄伏願上真降佑衆聖垂
慈護持向善之誠開迪自新之路完戰兢之晚節保閒

退之餘生更願家族平康子孫孝謹永賴昇平之化不
逢非橫之殃

禳謝

洪造難譖雖無私而示化至神莫測諒有感而必通靡
量微眇之誠輒覬高明之鑒竊念臣生逢聖世幼習義
方遭遇忝歷於四朝年齒將彌於六紀兩叨言路十領
郡符三總帥權五更使寄驟由樞筦再陟宰司或持生
殺之權或操刑賞之柄輕重固多於差誤施為或爽於

中和冒榮寵以踰涯積咎愆而既久揣分每驚於盈滿
予身宜被於菑殃然猶享寵祿於近藩保行藏於善退
妻室危病旋獲痊安目視昏蒙幸無苦楚既乏功行之
能致莫原僥倖之昌從上由君父之恩容陰賴神明之
相佑是敢輒伸丹懇仰謝真功伏望聖衆垂慈羣靈延
貺更願乞骸遂志養疾如期保家族之平康完桑榆之
晚節誓師慈儉仰荅生成

請死

物居過盛必有虧傾器忌滿盈理當顛覆矧無才德宜
取危言猶可自知難逃天鑒伏念臣生蒙道廕長遇明
時世習儒風存心必歸于仁義家傳聖訓立身咸儆于
詩書早承教於父兄晚叨榮於禁近再持宰柄十領州
麾今則感疾顛危垂年遲暮精神荒落手足萎蕤舉必
待人神將去體敢求延於鐘漏冀速返於泉扃伏望諸
聖垂慈上靈降佑但就匱盤之清潔靡罹牀枕之艱辛
而況平生絕施設之殃自信無潛蔽之慝宣尼嘗曰邱

禱久矣釋氏有云我向則消臣謹當永結勝緣堅持正
念期為慶瑞以福善人或有光靈仰裨神化

疏

同天節功德疏

右臣伏以西方妙教實資有道之因太上真文能益無
疆之算方正陽之盛月乃誕聖之昌辰延梵衆於精廬
肅道流於淨館潔伊蒲之饌冀調禦之等慈誦靈寶之
篇宜虛空之來相集多祥於帝所符善祝於封人竭螻

蟻區區之誠但瞻禮於北闕祝神堯魏魏之壽願獻頌於南山臣無任

同前

右臣伏以露囊紀節星電標祥當正陽用德之辰祈上聖無疆之算集法筵之清衆誦貝葉之真文天子萬年願固岡陵之遐福封人三祝徒殫螻蟻之微誠

私忌疏文

右伏以奉先追遠敢忘如在之誠供佛營齋庶備薦嚴

之福爰當諱日恭集妙因伏願慧日圓明智燈寂照悟
萬緣之非有了諸幻之無常不染一塵頓超十地

慈聖周祥道場疏

右伏以真遊遽邈奄及於朞周佛事致嚴恭崇於梵果
太皇太后德侔坤載世賴母儀爰當新穀之升始及收
神之旦聖孫孝享昭格於天心率土永懷咸均於孺慕
仰資僊馭式仗勝緣

同前

右伏以仙蹤既邈奄及於周祥佛事載嚴用伸於永慕
式薦在天之福罄輸率土之心恭惟尊號皇后定策兩
朝叅功十亂高名輝於圖史陰賜被於華夸爰當厭代
之辰虔設淨方之供伏願夙憑覺慧超證真乘悟圓妙
之勝因佑延鴻之寶祚

奉旨詣河瀆西海祈福消菑道場疏

右伏以金輪正覺唯主善而降康玉鏡高真每應誠而
孚佑至誠所達有感必通恭惟皇帝陛下德配乾坤恩

霑動植擁百祥之大順錫五福於羣生以道乘禧自天
垂佑宜享襲龜之吉旋臻勿藥之休仗幽贊於勝緣增
無疆之睿算臣無任

神宗皇帝升遐功德疏

右伏以翠輦超升闋徽音於軒鼎普天追慕想睟表於
堯牆爰憑十號之慈仰薦三清之福大行皇帝伏願常
居金地安住玉京陪五聖之真游佑羣生於法界

同前

右伏以乘雲厭代悲仙馭之難留率土摧心攀龍髯而
莫及仗金僊之妙教資玉鏡之真遊恭惟大行皇帝德
配乾坤恩霑動植新一王之制度復萬里之土疆方丕
顯於基圖俄遽遺於弓劍華夸孺慕寰海震哀爰遵乾
竺之文廣集苾蒭之衆香花嚴供鍾梵交音仰憑出世
之緣恭薦在天之果伏願逍遙寶地超悟真乘度沙界
之羣生佑鴻圖於億世

坤成節疏文

右伏以神光滿室共傳載育之祥梵印傳經遙祝無疆
之算寶花零亂淨域莊嚴周法界之三千贊壽齡之萬
億伏願太皇太后殿下東朝奠枕南面垂衣如月之恒
爰照臨於四國擬天之運永覆冒於羣生

同前

右伏以星流玉宇六宮曾慶於殊祥香散金田萬國共
祈於難老旃檀顯質貝葉翻經獻承露之仙囊布望雲
之法席伏願太皇太后殿下松筠比茂金石同堅房闈

燕居常範圍於天地車書共貫永帶礪於山河臣無任
坤成節開啟文

氣應金成當上秋之既望德符坤正屬聖母之題期肅
披西竺之文共獻南山之頌恭惟太皇太后殿下道隆
華渚慶邁層沙享榮養於先朝翊丕圖於興運式臨誕
節肇紀鴻名臣等志切同寅誠深報上虔趨梵宇仰祝
椿齡所覬川至日升擁珍祥而有永天長地久續睿算
以無疆祇款能仁洞祈昭鑒

范忠宣集卷十

欽定四庫全書

范忠宣集卷十一

宋 范純仁 撰

祭文

祭謝秘丞文

維治平二年歲次乙巳四月庚寅朔某日具位范某謹
遣人以清酌庶羞之奠致祭於亡友秘丞謝君師宰之
靈嗚呼師宰自天生德仁孝愷弟溫恭正直言參典章
動唯法則清靜寡私心如止水謙虛無我賢不自恃年

方及壯道已充已曾未設施疾以不起時惟聖師獨喪
顏子嗚呼哀哉識君之初君方幼齡龍駒鳳雛神骨天
成騰騫萬里誰測其程我之慕君聞道為先君之厚我
世舊以憐交深義合恩契綿聯情均手足幾二十年君
罷山陽我官東畿維舟相從浹日燕嬉君病東還我憂
惓惓執手相視忍涕而別孰謂伊人於斯永訣嗚呼哀
哉天之生君將澤蒸民君之不幸寧止其身朋友慟哭
善人悲辛嗚呼哀哉我從兄喪歸葬洛師纏哀在途銜

命東馳音問不繼承訃後時哭不瞻柩祭不及尸為我
之恨終身孔悲千里馳奠誠過乎辭君之神明鑒此不
欺尚饗

祭韓魏公文

維熙寧八年歲次乙卯某月日具位范某謹以清酌庶
羞之奠致祭於故司徒侍中贈尚書令魏國韓公之靈
唯公量包宇宙誠貫金石伊呂兼材淵騫比德降精星
辰瑞我王國在茂業與元勲信輝今而映昔仁祖夢卜

公秉鈞軸志扶社稷誓忘家族聖嗣勃興皇圖再續建
萬世不拔之基為四海無窮之福非天下之至明則孰
定計之神速若夫三紀弼亮兩朝顧囑智周慮遠仁深
義篤以名教為己任俾多士之誠服功蓋天下而沖退
不居貴極公相而謙卑自牧罄竹帛以難紀詎筆舌之
能錄薨於晝錦贈典繁縟祠於大烝盛美完足浹遺愛
於華夸痛云亡於比屋昔我先君志同體均出處竝命
六偕絲綸金蘭之契雖古罕倫矧余不肖辱視猶子推

輓保全教誨飲食聞一善則喜見顏色憫獲罪則憂形
歎喟滲骨淪肌恩深莫計念初違離八年於茲移官鉅
鹿瞻拜有涯中途改轅志願復違守官之邈神龜坐馳
豈圖承訃畢世長辭驚呼沈痛不特以私為朝廷惜與
蒼生悲生不能奉教於朝夕沒不獲盡哀於寢闈徒侑
奠以空言我公知乎不知嗚呼哀哉尚饗

與慶州官吏祭韓魏公文

年月日具位范某遣指揮傅政謹以清酌庶羞之奠致

祭于魏國韓公之靈唯公道足以窮聖人之奧故關盛衰而不倚德足以憲萬邦之重故踐文武而並濟弼亮三朝之盛扶登二聖之隆朝廷治忽伊尹所以自任邦國若否山甫所以儀圖翊成隆平坐致熙洽哲謀肅又宜神理之助順昌熾壽臧固興心之善頌天不慙遺人將安仰薨謝之訃上深惻於宸衷褒贈之章詔益進於寵數名固耀於青史祀已躋於大烝哀榮所加夸夏增歎唯斯邊氓早沐恩化爰從慶厯西討科役繁興綏輯

疲羸繫公是賴繼輟樞筦之責復將西撫之命厥後橫
山用武狂寇竊發公持四道之柄密授神算鎮以山嶽
之重迄臻安靜則唯茲土受賜為尤凶問之來孰不揮
涕某久被釣播方茲官守謹同吏民之情遠致薄奠報
德匪稱致哀無窮唯公英靈鑒此誠意尚饗

祭廟文

二首

年月日時具位范某謹以清酌時果之奠祭于某神某
被詔守土唯禮是循事神之意不敢不謹爰伸祗肅躬

謁祠下尚祈聰明俯垂鑒佑

熙寧八年乙卯歲二月癸亥朔八日庚午具位謹遣指
使侍禁郭進以清酌之奠敢昭告于土地之神某方茲
莅職宜新庶務廨宅弊陋將加繕完唯神相之宜無後
害不日告畢敢忘神休

脩文正祠堂祭文

維熙寧八年歲次乙卯二月癸亥朔十日壬申嗣子朝
奉郎守尚書工部郎中直龍圖閣知慶州軍州兼權發

遣環慶路經畧安撫使兼馬步軍都總管輕車都尉賜
紫金魚袋范某謹以清酌時果之奠敢昭告于先考太
師令公文正公之靈某蒙賴貽謀獲踐世職瞻仰祠貌
哀榮交心唯是塑繪弗工羣情未厭爰加脩繕以傳無
窮髣髴慈顏不任永慕尚饗

祭廟文

天久不雨禾稼將稿是用竭誠于神以祈濡澤薄奠屢
陳未蒙嘉應大懼執事者不克蠲潔牲牢不肥粢盛不

精而神不顧享夙夜惴畏不遑寧居乃涓日改牲再禱
于神唯神歆鑒以施沛然之賜尚饗

祭終南太白湫文

比歲不雨被邊之民流離孱亡所不忍視今夏驕亢復
甚焦灼涓禱羣望曾莫我助是用遠邀靈液以祈濡澤
神既戾止遽獲嘉應旱稼復蘇優渥霑足皆神所賜敢
不竭誠敢不腆禮以謝神貺惟聰明正直尚終沛施以
庶乎有秋也尚饗

祭呂虞部文

維熙寧八年六月日具位范某洎諸同僚謹以清酌庶
羞之奠致祭於故通判虞部呂君之靈嗚呼惟君奮身
經術潛心政事美績休聲聞於已試屈貳邊藩民懷吏
畏綱領衆務興頽舉弊人方荐飢溝壑誰濟君實孜孜
存養撫視憂勞成疾以至殄瘁仁者不壽天理曷恃邦
失賢佐孰不揮涕旅櫬東還川陸迢遞一慟長別痛徹
肝肺魂兮有知歆此薄醑

祭廟文

熙寧八年三月二十日具位謹遣隨行指使庫崇禧以清酌庶羞之奠致祭于城隍土地之神某蒞職之初解宅是葺陰期攸相有禱于神衆工經營逾月告畢土木無變庭堂一新獲此安居允神之賴爰陳薄奠以答靈休

送太白秋水祭文

熙寧八年五月二十四日具位謹以清酌庶羞之奠告

于太白湫之神惟神宅終南太白之奧出入變化濡澤
千里環慶邊壤比年旱亢守土者惕然遠求一勺之靈
以救枯槁神已賜之雨少有秋望不敢稽怠謹復遣供
奉官楊正奉神以歸神其鑒茲終是嘉貺

祭蔡資政文

元豐二年六月日具位謹以清酌庶羞之奠致祭于資
政諫議蔡公之靈嗚呼天生賢傑以翊昌時河嶽鍾秀
星辰孕奇唯公堂堂王佐之資少掇詞科出賓侯幕才

動羣公交章薦鶚歷職中外規模宏博按刑南服嗾禁
方愆兇狡冒利俗弊刑煩公拯其頽息賸人安畿甸置
使公膺首選掌漕于西金穀以羨荐帥慶渭兵銳甲堅
邊塞要地夸夏謳歡上新庶政注意鼎司公則大用文
武是毗憂勞積躬位以疾辭分臺別都方優養頤天乎
不憖明哲其萎昔我先門學多良士公實覩與許以重
器公於不肖眷矚為尤不鄙衰零姻婭是求自我別公
於今五年訊問稠重日覲平痊喪訃忽承悲徹肺肝謫

居千里哭奠奠前嗚呼永訣抱恨終天

祭監押劉供奉文

年月日具位致祭于監押供奉劉君之靈惟靈勤儉持躬廉謹率職忽焉壽終孰不哀惻矧我同僚涕泗盈臆奠茲酒醴旅茲肴核魂兮來歆幽顯永隔嗚呼哀哉

信陽軍脩鼓角門祭文

軍雖小邦古亦建國門闕所設號令攸宣眷惟樓觀之隳曷聳吏民之望度材有素更制未遑方卜日以肇新

在前期而除舊土木無變工徒用安有望於神陰相厥事

祭張復禮提刑文

天生賢傑將翊昌辰聖運龍興多士雲臻侶侶張公才識邁倫邑政殊尤超陞部使更典濟陰龔黃其治按刑畿右察廉是職舉善如飢化姦以德三載忠勞熙然美績盜發申郊戕民敗吏申無城兵比屋驚惴公來指蹤殲厥兇類千里獲安繫公是賴予方左遷始獲公遇推

借維持危乃弗仆輅車所臨謳頌洋洋天宜報公昌熾
壽臧胡奪民望而公云亡哲人之萎孰不痛傷家有令
子慶澤之長朝有令名後世之光公亦何憾歆此一觴

祭韓國富公文

嗚呼我公一代師臣始終名節玉潔金純策中大科王
佐之資入掌誥命朝夕論思慶厯西討師人財費北狄
驕慢乘我之匱命公徃使仗節專對折其姦謀朔陲用
又進貳樞筦謨謀宏遠權倖交愬東藩是典易帥青淄

河北荐饑流冗百萬稚艾相携鬼形烏面蟻聚三齊公
命羣吏築室止棲貸貲哺食如母憐兒卒逢善歲完飽
而歸孰謂公仁可敵天時仁祖命相公居家席密議建
儲宗室是擇先皇繼明扶天之力功初不聞後益顯赫
今上御極首膺注意以疾避權還政居第上壽而終五
福惟備國喪元老時頽泰山天子震悼士民悲酸嗚呼
哀哉先君文正識公於微矧伊不肖復辱公知狂率抵
罪屢貽嗟咨軫其顛危憂見色詞既獲安全終莫瑕疵

情均父兄恩重山丘公今歿矣誰復顧周既百身之莫贖諒畢世而難酬嗚呼哀哉

祭河中宋司錄文

元豐七年十月十三日具位謹遣司戶參軍劉格以清酌庶羞之奠昭告于故司錄宋君之靈嗚呼盛德之門文風孔碩唯君克世壽也奚嗇瞻言昊蒼俾予心惻奠以告違君其來格

祭謝大夫文

元豐七年
祭謝師厚

嗚呼嗟子生之多艱喪二子於濟南追殃咎以丐閒尚
淚迹之盈襟柰何良朋之復失益知天道之難諶枉孝
子之嘉命俾勒志于泉陰曾懇辭而莫獲愧才薄而弗
任叙賢業以直書之顯發於高深公有文以自傳既鏗
玉而鏘金奚他人之復仗固光耀於來今念相親於疇
昔辱洞照其誠心收蟠木以為器憐舊物於遺簪端歲
寒以見期寧燥濕而移音痛生死之俄隔邈標韻之難
尋昔郢人喪兮匠石廢斤子期亡兮伯牙絕琴今我存

而公沒悵星孤而月沈指新阡而一奠庶英魂之來歆

祈雪祭文

二首

爰自初冬時雪未降二麥虞枯槁之害庶民憂瘟疫之疾刺史之政不能召致和氣是用蠲潔酒醴有禱于神庶幾驅滌旱暵霧灑膏澤致民豐康繫神之賜

時雪久愆宿麥不滋是用有禱于神以丐甘澤既浹日矣寂爾無應豈刺史之誠不能感通神明而禮或不蠲而致然耶是用齋心潔醴再禱于神惟神聰明宜垂昭

鑒

祭程宗丞文

元豐八年
祭程伯醇

天生賢傑必將濟時胡屯其位不俾設施復奪之壽天
豈徒為伯醇之亡理益難推唯君之德顏氏庶幾唯君
之道孟軻無疵嘉言遠識後學所師進為御史言直身
危退治畿民如母憐兒再謫筦庫恬窶安卑伯仲孝養
親顏怡怡或祿或耕如堦應麓聖上繼明政推母儀選
登俊賢以輔邦基君首被召捧詔伸眉畎畝愛君心同

商伊如何邁厲梁壞山頽繫予不肖辱君重知夷吾多
罪鮑叔不疑君今歿矣吾道疇依身縻窮邊素車莫馳
遥陳薄奠寓哀以詞音容永隔畢世長思嗚呼哀哉

祭母中散文

母清臣元豐
八年十一月

南山峩峩八川蕩滴鄴杜之郊挺生人傑粲粲母公靜
深秀發徒步起家九卿是列澹然無營白首一節謝事
退居塵紛屏絕琴奕壺觴寄傲風月遽驚淪謝吞聲悲
噎平昔故僚契義稠結何以叙懷尊酒徒設長夜冥冥

音容永訣嗚呼哀哉

祭李運使太夫人文

猗歟夫人懿德如玉閨房之秀來嬪大族二子顯赫養有榮祿千戶疏封是宜象服總帳俄垂風飄殘燭悠悠素旒去此華屋獨有壺觴陳於路曲嗚呼哀哉

祭閻朝議文

元豐八年十一月

唯公仁孝愷悌稟乎天資精金美玉內外無疵力學登科甘貧樂卑教吏愛民如母憐兒出宰衛南警卒將叛

匹馬往喻式曷其亂後遷代城築防禦患河水大至役夫奔散公卧堤上將死其難衆皆驚還死力救捍屹然功成千里咨歎將陵被水徙遠河濱部使薦公往宰其民邑人遮留城門晝闔三日不行夜遁之官其狀上聞命公復還兩邑爭公白挺盈野諭以朝命哭不肯捨帝乃命公入佐大計非制之常以旌循吏時宰不合公則外補更符四郡人歌召杜博陵借寇久將變俗忽若使者手披公牘鬼錄之姦四十有六陰君召公典司其獄

無疾而終河朔所傳以公正直事或有然時方安民公則違世天不遺公來佐聖治豈公不偶人斯殄瘁交親之分金石相期官守遐阻歸紼莫持千里一奠曷窮我悲公乎聞乎永世長思嗚呼哀哉

祭司馬溫公文

維元祐元年歲次丙寅九月戊戌朔二十九日甲申中大夫同知樞密院事上柱國范某謹以清酌庶羞之奠致祭於故贈太師溫國公之靈嗚呼天胙有邦俾之元

龜篤生我公為世父師夷齊之清淵騫之德子產之惠
叔向之直人有其一足以成名公兼衆德乾乾不寧九
流百家金匱石室鈎索沈隱裁其失得根柢治亂經綸
皇極作為文章有書秩秩寶圭大裘望之肅然冬陽夏
冰赴者爭先仁英兩朝煌煌厥聲國有正人折姦于萌
荏苒者木求直于繩我公盡規君心則寧赫赫神考體
貌有德公獻其可嚴嚴翼翼言有未用不敢愛爵深衣
幅巾歸休於洛公則休矣四方顓顓君子野人洎於他

邦聞風懷歸於父於兄天施不齊或怨寒暑公獨何施
四海一譽元豐之末國有大事穆穆文母佑我聖嗣爰
立作相媚于神人我公在廷其重千鈞士賀於朝民歌
於廛農慶於野兵休於邊燠爾慄寒養其飢孱無疇於
肌無莠於田培其本根枝葉則茂豈曰我作憲章惟舊
於赫聖考左右上帝休公於家實遺聖子卷耳思賢夙
夜周京不惑不疑成此太平公之去來人之戚嬉非人
戚嬉帝之從違豈人事耶天實為之某不才辱公知深

人之相知貴相知心唯公我知洞達表裏采其所長謂
或可使申固義好丘山不移匪我則然公實取之泚泚
清洛獨樂之園嘉藥春敷脩竹夏寒清酌翛然我招我
從琅琅嘉言有銘在躬朝聽過實備位樞機入與國論
獲親風規六七年間為益不貲私祈白首從公以歸憂
勞傷生公既邁疾庶幾有瘳宰相王室國祠既誓公以
喪聞我心之悲不獲走門入哭於室公既大歛終天永
違不一見面人生有死如旦夜耳曾子將歿知免而喜

公身既脩公志既畢既壽令終無一或失有如公者古
今萬一我每念此紆心之悲猶有鬼神實聞我辭嗚呼
哀哉

祭太中大夫司馬公文

字伯康元祐
二年正月

唯公純孝愷悌剛明篤實精金璞玉混然天質致身三
朝躋位九列終始無瑕險夷一節生於德族出逢累聖
考貴而賢季則文正嫡配令壽化行閨門執笏垂魚多
子與孫天下達尊公全其三洪範五福公則能兼予謫

安陸公來守邦見賢就善我心則降公不鄙予定交忘
年久要不忘婚姻有聯子官京師季相當朝公處於鄉
將赴季招予亦思公心焉忉忉相以疾薨公不克來予
念公年羸不勝哀果聞訃音梁壤山摧嗚呼哀哉相知
以心世莫如公死生契闊喪事弗躬天實為之匪予負
公既悲且恨終天莫窮嗚呼哀哉

祭周朝散文

字敦夫元祐二
年四月十日

生之有死是惟朝暮百齡大期鮮或能度間有促延孰

識其故享非所宜悲用難措嗚呼敦夫生德則豐孝友
自少仁義積躬純懿之行鄉黨式宗錯綜之文士服其
工奮於清朝寔有成績所至必顯厥聞無斁領使一道
寬不容惡俗方察察君獨綽綽衆嫉君異君安我仁遠
巡後時逍遙道真少尹西都監州朔方有政有議不柔
不剛仁宜有年德宜有位曾未耆耄俄驚川逝越我士
夫痛此凶鞠曰天佑善胡斯不淑矧伊涼薄義忝姻好
稔君家行既久彌劬茲焉永訣孰均予悼寫哀於辭一

奠以告嗚呼哀哉

祭王中散文

字不疑元祐二年五月

唯公國士之秀相門之英行著溫恭道惟直清老盡色
養外忘寵榮退就閒官沖淡無營夢奠兆凶逝川莫停
仁者宜壽公享遐齡德必有位公登列卿積善之報子
孫繩繩在公無憾善人戚咨矧其朋游涕泗交頤絕絃
有恨廢斤抱思祖奠弗躬葬緇靡持寓哀以言公知不
知嗚呼哀哉

祭正議大夫張昌言文

元祐三年

唯公植德忠厚立心醇和積其奧學奮於賢科樂行內
實不求世名畏人我知聲恐過情奉身清約布衣菲食
及其臨義坦不少惜委已有餘以活餒寒公之所易人
之所難氣夷色溫若無不容及所當仁未嘗苟同道行
則進言違則退去就蕭然莫能留礙武濟之論萬世所
偉河朔之奏百萬復起仁者必壽古聖謂宜公雖有年
不究期頤士夫歎息民吏嗟咨家父征西公實從事忘

年見親漸磨以義遽喪良朋捨斤揮涕柩不引紼寔不
親臨寓辭寫哀尚想徽音

祭康國韓公文

元祐三年四月十三日

嗚呼我公篤生大家不以世資奮於詞華甲科巍峩聲
名益夸遂躋臺閣論議蹇蹇忠亮實塞寬仁剛健憂國
愛君發於至誠知無不為見於益爭一時建明或大或
細或既設施或梗而止然其大體一本公忠無有秋毫
介私取容樞府兵柄幽贊幾密遂相天子具瞻赫赫夷

險百途我心唯一憎愛萬變以義始卒尊重簡嚴陰消
邪慝衣冠堂堂稱是柱石閨門烝烝仁愛孝慈孰寡孰
鰥我與均之推轂善人不愛其力我任其咎無爾失職
祿賜萬鍾人不譏富平生親交予求予取燕語笑談孔
樂無嚴賓客滿堂不知其尊唯是不肖待以國士豈無
知己厚孰公似我之蠢愚中遭擯斥推抵屏卻誰嗟孰
惻公獨拳拳隻手引溺以其進退為己休戚守慶闕人
薦我貶所我誠負公不究任使歸來見公愧發於顏公

獨存撫知我過前延我室堂敦叙中外賢婦白髮命我
使拜遺親棄舊自昔匪今聞公之風實感人心告老去
位非天子意請不可奪三公就第公雖家居德義在人
山嶽隱然朝廷自尊具舟有司申伯信邁安車臨我握
手出涕謂宜百年黃髮覲齒人之云亡心之憂矣於穆
文母天子聖明兩宮來臨慟哭老成賻喪則豐贈官則
崇姑慰我心不能還公歸葬有期屬我以銘不腆之文
敢不顯明一觴在前如聞玉音嗚呼亡矣有涕如傾尚

饗

祭廣濟使君蔡承議文

元祐三年二月

唯君慶門之嗣清世之賢位不滿能沒於盛年天道難知善人咨歎人有所懷失則惘然況於死生親舊之間君少負才凌厲奮舉既將騫騰則復齟齬十年之間進退相補謂宜耆壽身顯名揚云何中道齎志而亡願既違矣人既非矣懷資抱器弗克施矣侑奠以言寓余悲矣嗚呼哀哉

祭申國司空呂公文

元祐四年三月二十六日

嗚呼我公清淨寡欲足以革化鄙污寬厚有容足以消
伏訛慝其默也能服物而不孚其簡也能治煩而不惑
嗚呼公能有餘於無為而他人不足於竭力也羣言繁
興辯者不給於口而公獨漠然而不唱大議未定智者
夙夜以思而公方安然而居息謂若後也而常先疑若
失也而皆得此四方視之以為表儀而二聖倚之以為
柱石也若其左右侍從密勿致君之謨與夫出入鎮守

慈惠愛物之績於公之長曾不咫尺也唯其左右王室
宰制萬物內尊朝廷外撫夸狄者庶幾究公之盛德也
某中年流落白首秉國獲同勤勞日奉顏色淡然其日
親裕然而多益也其心之所向意之所宅某既恃公之
相知而公亦了見其胃臆也嗚呼曷為少疾而莫救一
卧而永息也昨日揖於朝而今日哭於室也上公一品
固公職也仁者必壽七十嗇也嗚呼公乎小人之所望
以革心而善人之所恃以取直也老成云亡君子弔戚

往者何憾而存者惻也嗚呼啟國備禮天子之澤休功
顯問史有筆墨唯予心之哀曾是莫抑也尚饗

祭陳龍圖文

紹聖元年十一月

唯公材猷膚敏學術淵通榜竝龍虎光垂蜺虹踐履要
路華外煜中所至可述名高實充宣力累朝服休四紀
臨劇而簡視難如易屢領使權十年近侍晚請琳宮告
歸故里昔我充貢已挹風規同年賜第竝拜彤墀仕宦
相望鮮合多離公居河橋我忝并帥假道來之再陪高

誼別未幾年訃音遽至我病辭位聞公遘凶徃弔莫可
哀情曷窮竭來許下公穴將封敬陳薄奠聊寫初終尚
饗

拜掃祭文

考妣同

雨露既濡追遠增慕時享之禮敢忘虔恭謹陳薄奠以
伸拜掃

祭十九兄監簿文


雨露既濡對時興感薦享之禮敢忘虔恭謹陳薄奠以

伸拜掃

祭鮮于子駿文

嗚呼子駿居今之世志古之道白首好學耽玩易老見於事業發為文章治民則惠執義則彊柔亦不茹剛亦不吐邪則我仇正則吾與予昔使蜀封部實鄰聞其風聲愛慕其人同分西臺晚益相親茂林脩竹美景良辰杯盤草具笑語天真通家之好往事空陳年將從心乃補衮職拳拳朴忠侃侃正色病不克施終古遺直告滿

三月退卧淮陽山計遽來我心隕傷歸於其邱實適吾
鄉涕灑秋風醉此一觴



范忠宣集卷十一